

主席，本人代表政府第一標準薪級員工總會，講下公務員醫療福利的意見。第一標準薪級屬於政府基層員工，以清潔工人為主，筋骨勞損等慢性職業病，係我哋經常需要面對的問題。

我哋日曬雨淋搬搬抬抬，好多同事做到六十幾歲，咩毛病都出晒來。正所謂掃得清條街，但係掃唔清病痛。但係 2000 年後入職的公務員，退休後就有晒醫療保障，咁你叫我地呢啲睇唔起私家診所的基層工人點算？即係變相要扣除部份退休金，用來醫治工作勞損。

其次就係輪候時間過長。我同事做到勞損有腳痛，要輪一年。至於牙科，我本人的親身經歷係，做一個牙套要等三年。即使簡單如預約洗牙，都要等一年。輪候時間太長，小病都變大病，變相逼我哋去睇私家，醫療福利有等如無。

最後就係中醫問題。政府口口聲聲話推廣中醫，但公務員醫療福利就不包括中醫，根本係自相矛盾。西醫方法即時見效，但往往治標不治本，中醫則講求固本培元。我相信在座高官都會明白，有時候身體係需要慢慢調理，某啲情況係中醫比較適合。將中醫納入公務員醫療福利，係合情、合理、合法。如果醫管局無法直接提供中醫服務，大可以向非牟利機構購買。咁簡單既事，點會做唔到？唔該政府唔好再用啲無人信的籍口來推三推四。

簡單總結，我哋希望政府盡快處理以下三個訴求：

- 一、延續新制公務員的退休醫療保障，與舊制公務員睇齊；
- 二、增加公務員診所或名額，縮短輪候時間；
- 三、將中醫服務納入公務員醫療福利範圍。

多謝！